

ABIVRATIO

MVLTORVM ERRO-

RVM HAERETI-

CORVM,

PVBLICE ET SPONTE EDITA

à D.Ioanne Mathæo Gryllo ciue

Salernitano,

*Coram Illustrissimo Cardinale Arminiaco, & Reuerendissimo
Archiepscopo Auenionensi, aliisque Prælatiſque pri-
mariis Eccleſiaſticis & ſecularibus.*

Adiecta eſt eiufdem epistoſa, qua cauſæ reuertiſionis ad fi-
dem catholicam exponuntur.



ANTVERPIÆ,

Ex officina Christophori Plantini.

M. D. LXIX.

ABIVR

MVLTORV

RVM HA

COR

PVBLICE ET S

à D. Ioanne Ma

Salern

*Ceram Illustrissimo Cardinale
Archiepiscopo Ambronensi
marius Ecclesiasticus et fecit*

*Adiecta est eiusdem episcopi
dem catholicam exponunt*



AN
Ex officina

M.

ABIVRATIO

MVLTORVM ERRO-

RVM HAERETI-

CORVM,

PVBLICE ET SPONTE EDITA

à D.Ioanne Mathæo Gryllo ciue

Salernitano,

*Coram Illustriſſimo Cardinale Arminiaco, & Reuerendiſſimo
Archiepiſcopo Auenionenſi, aliſque Prelatis viriſque pri-
maris Eccleſiaſticis & ſecularibus.*

Adiecta eſt eiufdem epiſtola, qua cauſa reuſionis ad fi-
dem catholicam exponuntur.



ANTVERPIAE,

Ex officina Christophori Plantini.

M. D. LXIX.

ABIVRATIONIS RATIO

S E R V A T A.

HAEC abiuratio facta est II. Calend. Augusti, (qui dies diua Maria Magdalena sacer est,) in sacello palatij Apostolici Auenionensis: cum D. Ioannes Matthaeus Gryllus Salernitanus, stans se ad pedes Illustrissimo & Reuerendissimo Cardinali Arminiaco in Auenionensi legatione collega abiecisset, assidentibus Reuerendissimo Archiepiscopo Auenionensi, & R. P. Bernhardo Berardo Theologo & Inquisitore generali eius legationis, & R. Magistro Ioanne Nicolao Senatore in foro Auenionensi, & Iudice & Commissario generali contra haereticos & suspectos: praesentibus item D. Illustrissimo Scipione Vimercato equite ordinis Christianissima Maiestatis, & nobilibus Dominis Consulibus, & Assessore eiusdem Urbis, & Domino Lauro praeside curiae Galliae Narbonensis, & Domino praeside fori Auenionensis, & frequentissima honestissimorum hominum, tam Ecclesiasticorum quam laicorum, corona. Quibus omnibus audientibus, cum D. Ioannes Matthaeus haereses & errores clara voce abiurasset, & iniunctam poenitentiam recepisset, aduocatus Fiscalis generalis SS. Domini, & sanctae fidei Catholicae, pro re totius fidei Christianae, publicum instrumentum poposcit & obtinuit. Ea verò acta excepta sunt per Vincentium Siffredum Notarium publicum, & in maioribus totius palatij Apostolici causis Secretarium.

A B I V R A T I O.

3



EGO Ioannes Mattheus Gryllus cum iam septimum annum in hæresi Caluinistarum, quos Hugonotas vocant, agerem; tandem diuinitus permotus, decreui ad vestre Illustrissimæ ac Reuerendissimæ Amplitudinis pedes accipere, ut pro ea potestate, quam à Sancta Sede Apostolica accepit, possim absolutionem impetrare à laqueis detestabilium errorum, quibus partim assensus sum, partim me assentiri ostendi ac simulaui.

In primis igitur, cum principem quondam Salernitanorum diu secutus essem, cōfiteor memet in eos laqueos incidisse, tum ut principi exulego à patria obsequerer, tum præcipuè propter mea peccata id Deo permittente.

Initiò inductus sum in errorem, non credendo meritum operum Christianorum, & quamuis me conscientia coargueret, sæpius admonēs, Deum ac Dominum nostrum velle nos suis iussis & præceptis obtemperare, si modò cælum consequi velimus, & eius infinitum meritum neque Turcis, neque Iudæis, neque hæreticis, aut aliis infidelibus, neque item Catholicis

in peccato persistentibus, quicquam prodesse, propterea quod non studerent se per fidem vi-
uam, quæ per charitatem operatur, dignos red-
dere: Tamen lapsus sum in errorem, cum de ve-
ritate quærere negligerem, & eos consulere, à
quibus poteram rem omnem perdiscere, id quod
postea feci, & quidem, Christo gratia, maximo
cum fructu. Huius autem erroris & peccati ve-
niam humiliter & suppliciter à Deo Domino
nostro, & à vestra amplitudine postulo.

Purgatorium negavi, quanuis & fides uni-
uersalis Ecclesiæ, quæ errare non potest, & do-
ctorum omnium constans perpetuæque consen-
sio, & verbum Dei, quemadmodum postea di-
dici, & firmiter credo, me ad credendum, & ani-
mas præcipuè meorum parentum pijs suffragijs
iuuandas, ut antea facere consueueram, adduce-
re debuissent.

Omissi & negavi venerationem & piū vsum
sanctarum imaginum, Sanctorum patrocinium,
sacrarum reliquiarum cultum, indulgentiarum
thesaurum: & honorem, quem Pontificatui et
Apostolicæ sedis authoritati debebā, habere ne-
glexi: quā quidem authoritatem, etsi animo nun-
quam negavi omnino, quod videlicet videre eā
tā aperte à Christo Domino nostro institutā, &
semper ab vniuersa repub. Christiana agnitā et
rece-

receptā fuisse, postposui tamen falsæ authoritati hæreticorum, quam ipsi per vim & fraudem sibi assumpserunt. Confiteor me Ecclesiæ sanctæ ieiunia violasse ac neglexisse, sacra vota contempsisse, quibus nūc ad Christianam perfectionem adspirari, planè perspicio, hæreticorū libros legisse, cū potius fideles & veteres testes Ecclesiæ Catholicæ euoluere debuissē, eosque potissimum, qui cū primis Apostolorum successoribus proximi extitissent, veritatem me docere, atque expressam veræ Catholicæque Ecclesiæ Romanæ faciem ostendere potuissent.

Omnes propemodum Caluini errores saltem implicitè amplexus sum, temerè adhærēs potius opinioni vnius hæretici & apostatæ, quàm firmissimæ fidei vniuersali, quæ in verbo Dei benè intellecto fundata est, et ab omnibus Domini Dei nostricultoribus et amicis suscepta, ab omnibus sanctis generalibusque Concilijs explicata, omnibus seculis & toto orbe ab vniuerso populo Christiano probata & conseruata: veritatem tamen sanctissimi Eucharistiæ Sacramenti, Dei beneficio, nunquam negavi: quin potius semper integrè sincereque credidi, ipsummet corpus et sanguinem Christi Domini nostri, post consecrationis verba à sacerdote prolata, esse in sacratissima hostia, credens semper, quemadmo-

dum nunc credo, ut cum maximè, Iesum Christum, qui est omnipotēs Deus, quiq; per os omnium Euangelistarum, & D. Pauli & vniuersæ Christianæ Ecclesiæ, hunc sanctissimum cibū nobis dare se velle dixit, verissimè & re ipsa, ut pollicitus est, ita in ipsomet sanctissimo Sacramento præstare ac tradere, in quo etiam Sacramento, (quòd me diuina misericordia non omnino destituisset) credidi ipsum corpus & sanguinem verè ac re ipsa existere, quanuis aut homo illo non utatur, aut is, qui utitur, et pro cibo sumit, omni careat fide: siquidem intelligebam, et nunc quàm maximè credo, hanc veritatem non ex fide, sed ex virtute omnipotentis verbi & institutione existere, inuiolabiliterque pendere: sed quemadmodum diuina bonitas hoc mihi largita est, ut crederem: ita me me multo grauius peccasse contra diuinam Maiestatem, contra sanctos eius, & contra vniuersam ecclesiam sentio: quòd nihilominus, ut principi gratificarer, fabulosam & verè diabolicam cœnam hæreticorum septies sumpsi, pollicens prius eius infelici ministro, me assensurum vniuersæ doctrinæ, quam ipse eiusque secta profiteretur: pro quo scelere misericordiam diuinā imploro, & à vestra Illustrissima Amplitudine veniam posco.

Quapropter ex toto animo abiuro, detestor,

anathematizō has omnes & quascunquē alias
 hereses: me spontē ac liberē subiiciens grauissi-
 me cuique pœnæ, si posthac vnquam relabar,
 atque coram omnipotente, vero, & vno ac tri-
 no Deo, coramq; Beatissima Virgine Matre, &
 vniuersa celesti Curia, vobisque Illustrissimo et
 Reuerendissimo Domino Cardinale, & Reue-
 rendissimo Archiepiscopo & vobis, D. Inqui-
 sitore, & D. Nicolao sanctæ Inquisitionis Com-
 missario, coram denique his omnibus nobilibus
 viris, & populo, iuro & profiteor me cupere
 ac velle omnino diuinæ Maiestatis ope atque
 presidio viuere ac mori in gremio sanctæ Eccle-
 siæ Catholicæ Romanæ sub obedientia Sanctæ
 sedis Apostolicæ, eiusque ministrorum, credens
 & promptissimus ad confitendum ore & cor-
 de, vniuersam doctrinam iustificationis, origi-
 nalisque peccati, septem Sacramentorum nouæ
 legis, rituum, & caeremoniarum eius, sanctissi-
 mi Missæ sacrificij, Purgatoriij, indulgētiarum,
 votorum, Apostolicarum & Ecclesiasticarum
 traditionum, quicquid denique sancto Tridenti-
 no Concilio, & fidei confessione continetur,
 quam sancta memoria Pij quarti eiusdem Con-
 cilij decretum in lucem edidit.

EPISTOLA D. IOANNIS

Matthæi Grylli Salernitani, ad R. P. Fratrem Matthæum Gryllum ordinis sancti Dominici.

AD M O D V M Reuerende Frater ac Pater, iam diu nihil ad tuam Reuerentiam scripsi: huius verò diuturni silētij causa fuit, nō tā locorum, quibus dissiūgimur, interval- lum, quàm mea multis ab hinc annis à sancta fi- de catholica, atque à Dei Domini nostri Eccle- sia alienatio atque defectio: ad quam me diuina Maiestas secundum diuitias suæ misericordiae, cū primum reuocauit, & tuam Reuerentiam certio- rem facere volui, & hanc epistolā, quam tibi gratissimam fore non dubito, imprimendam curauī: vt hac ratione meo etiam officio satisfacere, quod me hortari & impellere debet, tum ad ea, quæ meo improbo exemplo publicè dedi, damna resarcienda atque præstanda: tum ad elaborandum, vt veritatis lux clariùs splen- deat, vnde Iesus Christus magis cognoscatur, cognitusque colatur.

Multis iam annis, vt tua Reuerētia nō igno- rat, sum principem Salernitanum secutus, qui hoc in regno cū esset, heresis tandem irretitus est laqueis, opera videlicet cuiusdam mulieris, qua

qua cum illi diuturna fuit consuetudo, per quam non aliter heretici principē corruerunt, quā olim per Euā sathan Adamū elusit, ac circūuenit. Et, quod ferè fit, ut eorū, quibuscum versamur et cōsuescimus, mores imitemur, ego miser ab iisdē sum deceptus hereticis, ita, ut per septē annos illorū sim secutus errores, non tamen sine perpetua animi mei perturbatione ac tēpestate. Tandem post multas clemētissimi Dei admonitiones, & eas cogitationes, quas crebras mihi hereticorum mores atq; aētus obiiciebāt, Lutetiae Parisiorū cū essem, ad sanctae ecclesiae gremium redire decreui, atque hoc animi mei propositum & desiderium Reuerendissimo Domino Episcopo Cenetensi, apud Regē Christianissimū Apostolico nuncio, aperui & exposui. Quod ut exequi possem, vitamque in Christiana pietate quietam & tranquillam agerem, recepi me in Agathensem urbē Galliae Narbonen. ad quosdam ex Regno Neapolitano nobiles viros, ubi ad Reuerendissimo illius urbis Archiep. admonitus, intellexi ad diuinam gratiam et misericordiam planè promerendā et consequendā me non oportere secreta aliqua & obscura poenitentia esse contentum, sed faciendum mihi esse, ut me in locum aliquem celebrem & illustrem transferrem, ubi meae conscientiae satisfacere possem.

Itaque pridie Calendas Octobris anni superioris ex vrbe Agathensi Auenionem disceſſi, vt meos errores apud Illuſtriſſimum & Reuerendiſſimum Cardinalem Arminiacum publicè abiurarem, & pœnam quamcunque mihi ille pro iure & poteſtate legationis irrogaffet, admitterem atque dependerem: verùm ubi ad montem Peſſulanum perueni, cùm eam urbem hæretici occupaffent, me quoque captum nō modò ſpoliarunt, ſed etiam, quamuis mei aduentus cauſam penitus ignorarent, tam diu tamen detinere voluerunt, quàm diu illa vrbe, quam cum alijs Regi ſuo rebelles inuaſerant, potiti ſunt: qua reſtituta, conſeſtim ſum Auenionem profeſtus, ubi & veritatem penitus accepi, opera ſcilicet, diligentiaque Illuſtriſſimi Cardinalis, qui me de omnibus erudiendum edocendumque curauit: & palàm ac publicè hæreſin abiuraui in eum modum, quem ſuprà huic epistolæ præſcribi volui.

Vera & præcipua mea conuerſionis cauſa proculdubiò Dei ac Domini noſtri benignitas extitit, qui vt ſua ſapientia ſuauiſſime omnia diſponit, mihi huius prorsus execrabilis hæreſis guſtum paulatim adimebat, atque in viam rectam ac regiam, quã cunctus populus Chriſtianus ſemper terens ad cælum contendit, me, quaſi
tacita

tacita & interna voce reuocabat. Hos caelestes monitus etsi diu repudiaui, quòd homines nimirum carnalis libertatis illecebris deliniti, & fœdæ voluptatis quasi visco inhærescentes, sese ad spiritualium rerum sublimitatem erigere et attollere nequeunt, aliquando tamen recepi, adiutus, ut mihi persuadeo, precibus & patrocinio Beatissimæ Virginis, totiusque Ecclesiæ Christianæ, & tua præcipuè charitate & pietate, frater obseruande, qui, ut ex tuis literis cognoui, Sanctissimo Missæ sacrificio continenter à Deo meam conuersionem esflagitasti. Multa præterea, quæ mecum quotidie cogitabam, & nunc etiam cogito, me vehementer in fide catholica confirmarunt: quæ res, vellem equidẽ, ut quieto, tranquillo & attento animo ab illis perpenderentur, qui in iisdem errorum tenebris & inextricabilibus labyrinthis versantur.

Prima est, hæreticorũ inter ipsos dissensio tanta, ut non solũ mutuo anathemate, dũ alij aliorum doctrinam inuicẽ detestantur, sed etiam armis decertent. Seditio Antuerpiæ nuper exorta, ubi Lutherani contra Calvinistas arma ceperunt, huius rei exemplum suppeditat, quod quidẽ factũ me tum ad inconstantiam atque dissidium istorũ cogitandũ excitauit, qui tamẽ suam quisque sectam in specie Euangelij tuentur, tum ad
 persfi-

perspiciendum infinitum Dei iudicium, qui vindicauit se de his inimicis suis: & tandem vtraque illa secta vnà cum aliis Anabaptistarum, Adamitarum, & similitum pulsa est, salua & incolumi Catholica & prisca religione, atque auitam possessionem retinente.

Alterà, cum hæretici nullū alium Iudicem, quàm sacram Scripturam se recipere profiteantur, tamen res eò tandem euadit, vt id solum in medium proferatur, quod Caluinus Caluinistis, Luterus Luteranis, Zuinglius Tigurinis, atque item alij hæresiarchæ suis discipulis scripserunt aut tradiderunt: neque verò interim apud istos aut constantis consensionis sanctorum patrum aut generalium Conciliorum, quæ ex toto orbe ad fidei dogmata sancienda, & quæstiones profligandas coacta sunt, aut perpetui testimonij Christianæ doctrinæ vlla prorsus ratio habetur, quanuis hæc omnia fuerint tot miraculis, tot sanctorum hominum martyrio, tãta pietate, virtutisq; probitate comprobata, diuturno denique studio veræ solidæque sapientiæ confirmata, quæ tandem de omnibus erroribus, quos à Christi ortu Sathan vnquam in orbem inuexit, semper magnificè triumphauit.

Tertia sacra Scripturæ trāslationes amplius septuaginta, eaq; inter se plurimum discrepantes,
paucis

paucis annis à nonnullis hæreticis prodierunt, cum veteres illi septuaginta interpretes vnam duntaxat, eandemque penitus consensientem ediderint. Catholica quoque Ecclesia multis iam seculis vnà tantum vtitur translatione, quæ non minus ad animorum catholicorum concordiam, quàm ad vniuersi orbis Christiani pacem conseruandam facit: dummodò ne aliæ temerè admittantur.

Quarta, in omnibus sacrorum Bibliorum voluminibus & exemplaribus, quæ hæreticorum opera edita sunt, videre est, non solum plerisque capitibus falsa præscripta lemmata, atque adulterinas inscriptiones, quibus mens longissimè aberrat à diuini verbi intelligentia: verum etiam in margine eiusmodi apposita scholia & glossæmata, quæ Christo apertè aduersantur, siue de sanctissimo Eucharistiæ sacramento, siue de re alia quauis agatur.

Quinta, maior est illis religio opinionem mutare, & fidei Iesu Christi rationem, mentemque subiectam & obedientem præbere, quàm diuinæ Scripturæ verba negare, mutilare, deprauare, & immutare. Testes sunt mei oculi, atq; aures, testes libri Luteri, Caluini, ipsa denique Biblia, si cum priscis translationibus conferantur.

Sexta, Veteres ac sancti Doctores quauis longissi-

longissimis regionum intervallis inter se disiuncti essent : tamen de Dogmatibus & moribus Christianis, vno eodemque modo, vnaque quasi lingua locuti sunt, & scripserunt : hæretici autem locis inter se alioqui propinqui & finitimi, opinionibus tantum distant, ut alter alteri aduersetur, contrariaque sentiat & doceat : Ita Calvinus Oecolampadij, Oecolampadius Luteri, Luterus Carolstadij, Carolstadius Davidis Georgij, Georgius Suensfeldij doctrinam oppugnat, ac labefactat : atque idem observare licet in ijs septuaginta hæresibus, quæ hac infelici tempestate Diaboli opera, & hominum scelere ab inferis extiterunt.

Septima, hæretici summo studio libros veterum sanctorum scriptorum comburunt & abolent : quos tamen magnoperè laudant, ut scilicet rudibus hominibus, quos deceperunt, persuadeant sua dogmata illorum scriptis fulciri, et confirmari. Sed ubi ad rem & certamen aliquando ventum est, nullus unquam hæreticus mihi probare aut ostendere potuit, D. Augustinum contra Missæ sacrificium, contra Purgatorium, contra sanctorum patrocinia, contra alia denique Christianæ fidei capita scripsisse.

Quod autem de D. Augustino dico, idem de cæteris sanctis patribus intelligi volo : quorum ne

vnam

vnam quidem chartam in linguā vernaculam conuertendam aut excudendā curarunt, pro tot mendacijs et tā impijs erroribus & sacrilegijs, quæ quotidie edunt, vt hac vanitatis offusa caligine, longissimè semper à luce catholice veritatis aberrerent.

Octaua, nunquā dederunt operā, vt ex quatuor illis vetustissimis concilijs aliquod prodiret in lucem, quāuis horum conciliorū authoritatem apud se tantā esse videri velint, vt in confessione, quam nobis proponebāt, ea recipi & admitti à nobis iuberēt. Sed miseros nos, qui tā stulte ac stolide ad æternā perniciē à quatuor hominibus ducebamur: at quibus hominibus? nequissimis, orthodoxæ religionis desertoribus, profligatissimis transfugis, perditissimis Apostatis.

Nona, omnes istos recētiore errores iā priscis temporibus, vt hæreses, sæpius explosos fuisse didici & confutatos. A quibus verò? à sanctissimis nimirum Pontificibus & martyribus, cū prius à plerisq; Theologis vniuersi orbis, et doctoribus accuratè et grauiter iidē errores agitati, et postea totius ecclesiæ populique Christiani consensus esset consecutus. Videat, quæso, & attendat vir doctus, quid de antiquis hæresibus Epiphanius, Theodoretus, Diuus Augustinus (vt ceteros omittam) præscripserint, siqui-

siquidem hoc verissimum esse demonstrat. vti-
nam & ego illos iam antè legissem.

Decima: vidisse nostra atate generalè Syno-
dum Tridentinā, ad quam cum sæpius ex omni-
bus Regionibus atque oris Episcopi catholici,
per medias hæreticorum & infidelium prouin-
cias atque vrbes profecti, conuenissent; tamen
neque de negotio catholice religionis dissen-
serunt, neque mortem metuerunt, (cum in pericu-
losissimo loco consedisent) neque dignitatis aut
aliarum rerum iacturam vel incòmodum timue-
runt, nulla deniq; vi terreri potuerunt, quo mi-
nùs veritatem profiteretur, & vera reforma-
tionis studio contra cuiusvis potentiam liberè at-
que fortiter tuerentur. Contrà, ex altera parte
nullus hæreticorum, quāvis fidem publicam obti-
nuisset, & eadem synodus in loco ab illis expe-
tito haberetur, ausus est vnquam accedere, vt in
medium suas opiniones proferret, quæ erant, si-
cut ipsi iactabant, ipsamet veritas, ab ipso sci-
licet Spiritu sancto profecta.

Vndecima: nullam hæretici inter se synodum,
seu potius conciliabulum egerunt, quod vel ad
vnum mensem duraret, aut probaretur, ac reci-
peretur. Testes sunt conuentus Vormatiensis &
Marpurgensis sub Carolo quinto imperatore ha-
biti, in quibus diuersarum hæresum ministri nulla
omnino

omnino ratione in vnā potuerunt ire sententiam. Testis rursus, cœtus istorū in pago Possiaco, nostra memoria collectus, vnde Petrus Martyr, Beza, & Marloratus inter se mutua contentione discordes discesserunt, nec aliud quidquā confectum reliquerunt, nisi pestiferā ambitionis facem, quæ penè innumerabilium Gallorum animos & inflammauit antea, & nunc etiam vehementer inflamat.

Duodecima, Nemo vnquam hæreticus Christianam fidem, seu religionem vsquam primum statuit, sed contrā, institutam euertit frequenter ac sustulit, qui mos istorum est proprius.

Decimatertia, non est inter istos verus aliquis historicus, neque quicquam tale à suis imprimi aut edi permittūt, sed quædam solū chronica, aut rerum gestarum compendia, quas ipsi historias ecclesiasticas vocant: in quibus auctores, quos adducunt, quo pacto ab rudibus et imperitis legentur, cum apud illos nec excudantur facilè, nec in maternam linguam vertantur, sed vel supprimantur, vel de medio prorsus tollantur? Præterea mendacia, commenta, fraudes, nugas, tenebras, quibus & clarissimam antiquitatis lucem obscurare, & suam vanitatem aperte veritati anteferre conantur.

Decimaquarta, Res quæ præter ceteras me

commonit, ea est, quòd animaduerti id iuris & potestatis, quod Pontifici maximo & Episcopis alijs, quasi pietatis studio ducti, aut, ne Christi auctoritas minuatur, veriti detrahunt, sibi tandem impudenter sumunt atque arrogant, unde passim diuortia iubent, noua coenae Domini (ut ipsi loquuntur) & baptismorum genera et ritus instituunt, plenus indulgentias, & iubileis ijs potissimum elargiuntur, qui sacrilegijs, templorum spoliatione, decimarum prae-datione, urbium oppidorumque direptione, caedibus & omni genere crudelitatis ceteros antecedunt. Quid? nonne iidem & nouam ministrorum formam excogitarunt, quos Gebennam mittunt, ut nouas sibi bullas ac diplomata impetrent: & catholicae fidei, quae in baptismo Christo fuit obstricta, ab iuratiōe à singulis exigunt: & publicas poenitentias iniungunt, & grauiter ac seuerè inquirunt in eos qui decreta & sanctiones minoris et maioris seuatus Gebennensis contemnunt, ac violant: & priuilegia cōcedunt, quorum beneficio liceat maritis & haereticis habitum induere clerici, monachi, Episcopi: bullas dant, & diplomata ad ineundam beneficiorum, quae ad ipsos nullo modo pertinent, possessionem. Cuius ministro amplissimam absoluendi tribuunt facultatem sine ullius criminis exceptiōe. In matrimonijs laxant

laxant habenas potestatis, in quoniam gradu affinitatis & cognationis, & multitudinis vxorū, Mahometano more ac ritu, cum qua secta his vitæ institutis & moribus ita consentiunt, ut mirandum non sit, si non ita pridem in Pannonia à quopiam Bassaio, & proximè Constantinopoli ab ipsomet Turcarum tyranno, ad perniciem Christiani nominis auxilium petierunt.

Decimaquinta, ut omnem penitus vitæ libertatē, quæ mera est et turpissima seruitus existimanda, retinerēt, antea negabant se, aut à rege, aut à magistratu aliquo ad Missæ sacrificiū, ad conciones catholicas audiendas, ad reliqua ea præstanda compelli posse, quæ Deo iam inde ab ipso baptismo sanctè promiserunt: cum tamen iidem isti noui prædones, posteaquam vrbes ceperunt aut occupatas tenent, quàm innumerabiles, & quidem inuitos, & religione repugnantes, tamen gladio & fuste ad illos execrabiles & sacrilegos cætus urgere & compellere ausi sunt? quàm multos item inmanissimis tormētis excruciatos necarunt?

Decimasexta, ex istorū ministrorum impuro atque impio ore, nihil aliud vnquam audiui, quàm cōtra tum sacros, tum profanos magistratus cōiucia & maledicta; libros verò simili petulantie, contumelie, contumacie, arrogantie

refertos, sædissimis atque odiosissimis in scriptos titulis: non virginitatis, pœnitentiæ, ieiuniorum, sanctæ pauperiatis, votorum, omnium denique virtutum: cuiusmodi inscriptionibus veteres scriptores suos libros commendarunt, ac exornarunt.

Decima septima, tantū abest, vt quidquam certi ex ipsis acceperim, vt etiā, quidquid mihi dicebāt, id aut impudēs mendaciū, aut fraudulentā dissimulationem, aut merā prorsus hypocrisin esse compererim. Quod maximè in monte Pessulano detētus perspexi, vbi ea mēdacia, ipsismet authoribus sparsa ferebant, quæ vix cuiquā in mentē venire posse videātur. Et quidem his mendaciis & cōmentis vsi sunt, et ad exigendas extorquēdasq; pecunias, et ad milites, homines imperitos & simplices, continendos in armis, quæ quamobrem sumpta essent, ne ipsis quidem satis constabat.

Decima octaua, animaduerti tandē, ac sensi minimè mirū esse, si ad hæreses suas probādas, atque persuadēdas, Euāgelij; ad ecclesiam labe faciendā, & euertendā, Ecclesiæ & religionis nomē vsurparēt: cū ad rē bellicam, legitimorum principum et nomine abuterētur, & potestatem interim inuaderent, & assumerent.

Decima nona, ex tanto studio verbi Dei, quod
isti

istli sequi se, & explicare iactāt, nunquā neque maiorem populorum erga suos principes obseruantiam et obedientiam, neque puriorem castitatem, neque maiore vitiorū fugam, neque frequentiore sacramentorum vsum, neque seniore vitam disciplinam, neque victum parciorē, neque vllum denique verā solidāq; virtutis signum aut indicium deprehendi.

Vigesima, ex istis ministris neminem vidi, qui tot rebus per vim ablati cuiquā suorum religionē iniecerit, vt eas restitueret: cū catholica ecclesia non prius potestatem libertatemq; , ne sui quidē corporis, vlli permittat, quā omnia reddenda curet, etiam Indæis, nedum Christianis.

Vigesima prima, Hæresis, vt suam ditionem tueatur ac seruet, modò Euangelij & religionis nomen, vt dixi, modò peculiaris aduersus aliquam illustrem familiam contentionis titulum, modò communis boni causam præten dit: & tamen, quantum commodi attulerit Reipub. aut quam concordiam, seu religionem polliceatur per has rationes & præsidia, quibus hætenus vsi sunt hæretici, luctuosa & funesta Germaniæ, Heluetiæ, Angliæ, Scotiæ, et huius Regni calamitas docet.

Vigesima secūda, nunquam accepi hæreticos honestam et legitimam, et bonis rationibus par-

tam victoriam reportasse : semper autē victos
fuisse, ubi nulla fraude proditioneq; niteretur.
Eius rei testis est D. Monfortiensis, qui mille ho-
minibus ad honorem sanctissimæ Trinitatis di-
stinctis, tum confessis, & Eucharistiæ sacramen-
to confirmatis & munitis, centum millia Ara-
gonensium, qui hæreticis Albigenſibus auxi-
lio venerant, adortus, ad xx. millia interfecit,
reliquos fugavit ac fudit, illorum Rege occiso,
cū ex suis catholicis non amplius septem vel
octo desiderasset. Testes Christianissimī Reges
Galliæ, qui religionis causam ex animo suscep-
tā contra Arrianos, aliosq; hæreticos, aut con-
tra Sarracenos & Turcas, nunquam defende-
runt, quin Dei exercituum, qui superbos semper
dispersit, auxilio freti, multas & præclaras vi-
ctorias obtinuerint. Testis Carolus V. qui victor
ad flumen Albim exercitum hostium concidit,
eorumq; Ducem feliciter cepit : ut omittam
Heluctios, qui numero quingenti, decem millia
hostium vicerunt, tum, cū est Zuinglius in-
terfectus : & illa in Bohemia centum millia ru-
sticorum celeri internecone deleta. Iam de re-
centibus victorijs nihil dico, quæ & maiores,
& illustriores extitissent, si à catholicis copijs
et pietate, quam quotidianis institutionibus ca-
tholica docet ecclesia, studioque divini honoris
pugna-

pugnatum fuisset, aut si veri tantum catholici sine hereticorum colluvione, aut sine societate prudentium huius seculi, delecti ad preliandum fuissent.

Vigesimatercia, ministrorum, quos vocant, & aliorum hereticorum opera et studio, vidi Caluini ac Beze imagines per totam penum Galliam disseminatas, ut in Germania Luteri, Iohannis Hus, Melanchthonis, cum interim isti nos idololatrias appellent, quod summa pietate ecclesia sacras Iesu Crucifixi, Beatissimae Virginis, & aliorum sanctorum ac beatorum signa, imaginesque proponat, quarum adspectus nostram memoriam ad religionem, & omne virtutis excitat genus.

Vigesimaquarta, Quae admodum Christiana et catholica ecclesia sua habet martyrologia, quibus Apostolorum mors atque obitus continetur, et eorum, quos in actis Apostolicis S. Lucas commemorat, ut D. Stephani, & ceterorum, sic heretici sua item martyrologia (si hoc tam honesto nomine sunt appellanda) composuerunt, quae in curijs et senatibus sunt, non exempla virtutis, sed criminum ac scelerum commentarii, et capitales libelli: quibus illorum hominum ob adulteratam pecuniam, ob seditionem, ob heresin, et alia id genus scelera, poenae suppliciaque à Christianissimis principibus decreta atque imposita continentur: & tamen in ijs ipsis martyrologijs, tantum abest

ut Apostoli, aut alterius sancti cuiuspiam, aut ipsius Christi vitam inferere voluerint, ut propter intestinum in ecclesiam catholicam odium, ne pueris quidē sacro fonte ablutis, Petri, Pauli, Barnabæ, Augustini, Antonij, Francisci, & horum similium nomina patiantur imponi.

Vigesimaquinta, In Calēdarijs, quæ suis psalmis præscripta & apposita habēt, isti pro Christi Natali, Funere, Paschate, proque martyrum nece, & festis diebus Beatissimæ Virginis matris Iesu, festos dies Iudaicos collocarunt, homines synagoga atque umbræ, quàm ecclesiæ ac lucis studiosiores. Itaq; apud istos iam complures reperiēs Hebræis aut ethnicis nominibus appellari: ut vel hinc coniecturam facere possis, quo loco habeant Christi legem.

Vigesimasexta, tam dissimilis precandi ratio ac ritus istorum & ecclesiæ catholice: siquidem hæretica precatio ab infelicissimo quoque, vel ab aliquo puero in medijs plateis ac compitis, & ex psalmis per Marottum translatis, et multifariam deprauatis habetur, in quorumvis hominum frequentia & collusione: cum nostra catholica in templis habeatur cultui diuino dicatis, idque non semel in die, sed septies, quemadmodum sacris literis admonemur, adeo, ut ad mediam vsque noctem, cum maximè tenebra-

rum potestas viget, hora nulla penè præterfluat, quin plurimis in cœnobijs viri, sœmin.e-
 que seorsum psalmos, laudesque Domino Deo
 nostro, totiſque curiæ caelesti sanctissimè con-
 cinant.

Vigesima septima, re ipsa comperi & vidi
 omnes hereticorum conuentus, consilia, ara-
 ria, eleemosynas, surueglians, vt vocant, mi-
 nistros diseniens, diaconos, nil aliud præ se ferre,
 quàm euocatorum militum multitudinem ad
 arma excitatam, vt inde videlicet fructus
 oriantur ij, quos multæ prouinciæ, dum indul-
 gent nimis, atque conniuent, maximo suo malo
 sensere.

Vigesima octaua, si quis genius & ratione co-
 rum vel concionandi vel plebis ad arma vocan-
 dæ diligenter attenderit, nihil denique aliud ab
 eis agi reperiet, nisi vt imperitorij vite animæ,
 fortunarum periculo & damno, libertatem il-
 lam suam & apostasiam tueantur: cuius reti-
 nendæ causa nunc ad arma confugiunt, qui se nu-
 per in cœnobijs ab omni calamitate, solius Dei,
 legumque præsidio defendebant.

Vigesima nona, Animaduerti præterea, in
 ecclesia catholica prædicatione verbi Dei nun-
 quam defuisse, & quidem eo linguae sermo-
 nisque genere, quod ab omnibus posset intelligi,

Et ne in ipsis quidem quātumlibet contemptis pagis, post euangelium, recitationem Decalogi, Symboli Apostolici, & orationis Domini-
cæ: nisi quis forte populus per fragilitatem aut aliquam animi perversitatem audire recusans, apud se consuetudinem hanc tam latè patentem extinxerit. Illud verò mihi præcipuè stimulus ad cōversionem admōuit, quòd cernerem quā pulchro ordine ex ecclesiæ instituto per totum annum representatæ, quas Euangelium describit, actiones Iesu recurrāt: ut nullus tam Idiotā reperiatur, cuius animus ad pietatem accendi non possit ex natiuitate, circumcissione, apparitione, passione, resurrectione, ascensione Iesu, missione Spiritus sancti, festo sanctissimæ Trinitatis, corporis Christi in sacrosancta Eucharistia, & aliorum huiusmodi, quæ ex Dei verbo sancita sunt.

Trigesimo denique loco, ut alia multa præteream, istorum qui se novos iactant Euangelistas, & Apostolorum, & qui verè Euāgelistæ fuerunt, quique illis succedere, vitæ morisque vniuersi dissimilitudo. Illi enim ab eremis, ab ieiunijs, ab omni paupertate & castitate ad promulgandum nobis euangelium prodire, doctrinam suam aut expresso Dei verbo, aut veris miraculis approbantes, aut publico legationis sue testi-

testimonio, ab ijs ad quos apostolicum eligendi
ius, apostolicaq; doctrina perpetua et legitima
successione peruenerat: at verò noui Euangeli-
stæ, à cubilibus plenis incestuum monialiũ, quæ
Deum ipsum repudiarunt, ab omni vitæ intem-
perantia, sine diuini oraculi testimonio, sine mi-
raculis, sine legatione, in concionem asscendunt,
mercesque suas vendunt quàm carissimè, si-
quidem pro simplici catholicoque concionato-
re, qui pauperiorem & vouerit, & Dei benefi-
cio colat ac tucatur, circũueniuntur rudes ad a-
lendas vniuersas familias Ministrorum eorum-
que diaconorum, surueillans, quibus argētum
à templis fanisque ereptum non fuit satis ad in-
credibilem explendam cupiditatem: catholici
verò submissee sine humanis opibus, sine vi Euā-
gelium disseminarunt, populosque dicto audien-
tes vel ipsis tyrannis reddidere: Isti autem ar-
mis, vi, contumacia omnem defectionem cala-
mitatemq; aggrediuntur inuehere. Illi templa
ædificanda, loca Deo dicata exornanda curabāt:
Isti more Vandalarũ, Gotorum, Iudeorum, illa
ipsa demoliuntur, lapides & ornamenta nō ad
pietatem, non ad tenuiorũ egestatem conferunt,
sed quisque sibi vendicat ad egressariũ ex clau-
stris Monacharũ, lectorum, corporũq; suorum
cultum, quæ prius diuino cultui seruebant.

Atque

Atque hæc quidē sunt causæ, quæ me ad pristinam religionem reuocarunt, cum illud etiā me acriter incitaret, quòd tandem vidissem eos, qui inter hæreticos ita reformationis Christianæ Reip. studiosi videbantur, magis ab ijs episcopis vel prælatis iuuandis abhorrere, qui illam studēt inducere. Ita, si quis Monachus rebellis sit, multos inueniat adiutores, vt Abbas tandem aut cedere, aut inperpetuū disceptare cogatur. Huc accessit, quòd hæreticos homines animaduertentia doctioribus, sanctioribusq; Põtificibus, aliisque sacris hominibus, & iis religiosorum ordinibus, qui accuratius paupertatem, et reliqua vota excolunt, quiq; plus populos doctrina, sacramentisque iuuant & fouent, acriores esse & infestiores inimicos: itaque fructus iam hypocrisis & simulationis apparent, si cui nõ planè cor obduruit, intelligentieq; lumen extinguitur est.

Quibus rebus, alij item multi ad catholicam se religionem referunt, iamq; in Narbonensi Gallia, de mortuis hæreticorum ducibus, qui rudiores metu continebant, facti sunt catholici ad quingentos. In eiusdē Prouinciæ oppido Aquis Sextijs procurator quidam Regius hæresin summa sua voluntate publicè & abiurauit, et detestatus est. Arclate præterea vir quidam nobi-

nobili loco natus, idem omnino fecit. In ea item parte Galliae Narbonensis, quae vulgò Languedoc appellatur, huiusmodi exempla quotidiana cernuntur, ac propemodum iam innumerabiles eo sunt animo, ut ad ecclesiam catholicam edicto aliquo regio reuocari & cogi concupiscant: residet enim in illorum animis nescio quid humani pudoris atque consilij, quod nomē aliquod excusationemque desiderat apud eos, quibus hereticos se fore professi sunt. Tum ego minimus omnium, cum nullius iussum expectare deberem, qui iniussu omnium mea ipse malitia religionem deserueram orthodoxam, ad eandem summo cum animi ardore me recepi, sperans diuinam mihi maiestatem pro sua clementia daturā stabilem, eternamque constantiam: quocirca & iam te R. P. oro atque obsecro, ut Deum, Sanctosque omnes, ut mihi semper adsint, preceris. Has litteras Polixenae uxori & omnibus propinquis, amicisque nostris cupio esse communes. Deus autem & Dominus noster nobis pro sua benignitate & clementia benedicat, atque ad suum gregē oues reducat errantes, in quibus ego ita diu numeratus sum. Auenione 9. Cal. Aug. 1568.

Vestrae Reuerentiae Frater
observantissimus
Ioannes Matthaeus Gryllus.

Haftenus ex edito apud Dilingam
1568. exemplari transsumpra sunt ea,
quæ hoc continentur libello : id quod
hic propterea dictum & adiectum volui-
mus, ne quis inuidus vel recens confi-
ctum, vel heri aut nudiustertius somnia-
tum traducat: alioqui sciturus & hoc,
editionem istam ob id potissimum fa-
ctam,

*Virtutem vt videant, intabescantq; relicta,
Errantū quosquos malè habet conuersio fratrum.*

L V C. 5.

Congratulamini mihi , quia inueni ouem
meam quæ perierat. Dico enim vobis,
quòd ita gaudium erit in cælo super vno
peccatore pœnitentiam agente, quàm super
nonagintanovem iustis, qui non indigent
pœnitentiâ.



1.006.643

SVMMA PRIVILEGII.

Regiæ Maiestatis priuilegio concessum est
Christophoro Plantino, vt libellum hunc, cui
titulus est, *Abiuratio multorum errorum He-*
reticorum, Domino Ioanne Gryllo autore, & cat.
imprimat & vendat, vt latius patet in literis illi
concessis, Bruxelle decimo quarto Febr.
Anno M. D. LXVIII. stylo Brabant.

Subsig.

Bourgeois.

2-10-1875
The following is a list of the
names of the persons who have
been admitted to the
membership of the
Society since the last
meeting of the
Committee.











